

## 2 Tesalonaika

<sup>1</sup> Nai Pol, Sailas agod Timoti, girek e migire yen aŋ Kris midaen a Tesalonaika na yan aŋsam na migane ipalu da. Aŋ Anut idsdad Tamad iŋ Tubun ak Jesus Kristus da, sisem amado da.

<sup>2</sup> Anut idsdad Tamad agod Tubun ak Jesus Kristus da iŋsad ilo panek agod ilo maror da dupanaŋ a.

### *Jesus Kristus imul ipalu san ru*

<sup>3</sup> Nai teig taog, maŋ pempem aŋ niŋemi wo Anut ilo uyan mupani da. Ago migane dan man uyan a, man dugo, aŋsam ilo rumok Anut lo man tubun mok ilasa da. Agog nug niŋen o amat dan dam tubun geig ilasa oŋ da.

<sup>4</sup> An niŋen o saen maŋ Anut san Kris midaen luluŋad lo mitililani an, aŋ yanjam mabisa se ya. Ata wo? Fun aŋsam ilo rumok tubun geig, agod aŋ Tubud san dal lo atur sakar oŋ da. Aenta madai iŋ misilanek da dupanaŋ pe lo au adu o da, ak man mel an aŋ patum apani da.

<sup>5</sup> Kulob a kuai tem ikibiai panad dan man, Anut san bitinaek itaot mok a. Ru e njabol en fun man, muruan wei mi aleg, an lo Anut malan lo iŋ awok ipanaŋ dop, aben a Anut kagin ipanad san an lo aladu wa. Aŋ aben an san a, aben an lo au ak niŋen o aŋ madai gamu akubiani da.

<sup>6</sup> Kagin a Anut aŋ o igane yan nek itaot a. Man dugo, iŋsan ilo sou lo tamolpein a gamu muruan dupanaŋ dan mite gup naon muruan ipidinaip, an lo madai tubun ak dile wan itaot geig a.

<sup>7</sup> Mel en dam inj malan lo itaotan a. Inj anj muruan a ale dan yaes ipanaŋ a, ago dop anj maŋ da sisem yaes bilabal lo tiladu wa. Sanjeptap saen an ilasa wak i? Saen Jesus injsen yai balen tubun ak aman da did panu ibisei dan lo, tinin walal te iganep ilasa wa, agod injanen eŋel adi dabdabai ak dida dumul dupalu wa.

<sup>8</sup> Saen an lo, inj injanen pani naon injsen lo inawai geig ak da imul a. Ago dop tamolpein ensauta a Anut ta dulon na, agod tamolpein ensauta a bilaluŋ Tubun ak Jesus niŋen o ilo rumok adi dufulaleg dulon gug ta duri na yan dam, naon saian geig ak ifuli ipidinai a.

<sup>9</sup> Muruan mitep dile wan man, daonj pempem yen yau san, amaiak lo dudu diau a. Naod dam ifutanip an lo Anut san madok an patun fo dilasa dop, injsan dabai girager anda yan ta dile na wa.

<sup>10</sup> Nal an lo, inj imul ipalup injsan tamolpein gun ak luluŋjad lo ilasa dop, yaŋak tubun a girager anda yan injane wa. An lo dop, tamolpein ensauta a ilod lo rumok an malad bulbal pe malad ti ibol pe dile wa. Agod anj dam luluŋjad lo amado wa. Man dugo, saen maŋ injsan ru mabol ilasa se yan anj ilom lo rumok a.

<sup>11</sup> Maŋ mel an niŋen o pempem anj niŋemi wo maŋsama gudanek igo migane da. Anut injsen, anj injanen wagin anjane wo idaisuda an niŋen o idiranj alasa wa. Ago dop injsan dabai lo, ilo isou dugo yak agane dan, agod urat a ilo rumok lo ilasa dan dam, an fidian aganep itout a.

<sup>12</sup> Maŋ ago mugudani dan lo tamolpein aenta anj niŋemi wo idsad Tubun ak Jesus yaŋan diabisa wa, agod inj lo yak niŋen anj dam yaŋam diabisa wa. An

lo ilasa san dal an man ilo panek a idsad Anut agod Tubun ak Jesus Kristus da dupanaŋ dan, nek an mi a.

## 2

### *Kubiaeŋ rijnanek tamol*

<sup>1-2</sup> Teig taog, idsad Tubun ak Jesus Kristus imul ipalu san, agod id in da sisem tutumani san dam niŋen o kudodom agure wa. Aenkadi Tubun ak san Nal ilasa la yan niŋen ago dubol da. Profet ru ta boi, tia, maŋsama girek ta boi, tia, ru tim maŋ awama lo ilasa ago dubol boi, gidad, ru naok ago yan alon tap, ilom lo ta rumok na wa. Gidad, maŋ ru dabai ak lo igo murupaiaŋ den alon a, ririan arut dop ajanem kankan ta yau imul na wa.

<sup>3</sup> Mel an niŋen o tamol ta ale funi dop dal ta lo ta irawaŋ na wa. Tia, nal an ta ilasa na dop, awa bitek san nal imug mi ilasa wa, ago dop kubiaeŋ rijnanek tamol dam in walal te ilasa wa. Tamol an man daŋsan gib lo idu san mi a.

<sup>4</sup> Tamol an tamolpein sad anut gidigidad adi fidian sad ager, agod melmel fidian a tubud igo woŋ ubou ad dile dan sad ager tamol dam imado da. An lo iŋsen yaŋan yabisa dop, iŋanen madok aben a Anut san ubou ab lo yan iŋanep, an fo imasip igo ibol a, “ŋai mi Anut.”

<sup>5</sup> Aŋ ilom iŋaoŋ boi, saen ŋai imug aŋ da tumado na yan, ŋai mel a niŋen o ŋurupaiaŋ se yan dag ilom iŋaoŋ i?

<sup>6</sup> Agod gamu en, mel a tamol an yabituani imul pe walal te ta ilasa na wan aŋ alon uyan a. In ago imado yaup iŋsan saen fo gup kuai te ilasa wa.

<sup>7</sup> Man dugo, kubiaeñ pilalek san dabai en manuk lo mi tan en lo urat igane la ya. Ak gug, enti inj an yabituani imul o ago igane yau dop man, Anut inj talpein a dabai saian ak yabituani dan gigin na iganep, an lo dabai saian an ibisei yau a.

<sup>8</sup> Saen an lo mi kubiaeñ rijanek tamol an walal te ilasa wa. Ak gug, Tubun ak Jesus iñsan Awan Ur nam tamol an mitep ibili idu wa, kumaen panu lo imul ipalu san lilaman girager an nam, daonj ipani wa.

<sup>9</sup> Kubiaeñ rijanek san tamol an Jesus gamugo imul ipalu dop ilasa wa. Tamol an Satan san tuon lo ipalu wa. Satan tamol an patun fo itur pe ibinawip, an lo dabai awan isa yan lo kulob girager sewak ak, agod kulob tini urer san dam tamolpein naod na idiri ilasa wa. Melmel an Satan san Ru Sewak ak san mi a.

<sup>10</sup> Agod kagin itaot tia yan san rawek naok sensen ak lo, tamolpein a daonj panek san dal diri dan irawai mok a. Inj daonj panek dile mok a, man ata wo, ru rumok an niñen o dumat pe an lo Anut patud ipasi wak diñane san o dumoi da.

<sup>11</sup> Nek fun an niñen o Anut inj tubun mi ilod iduduñjanip an lo iñsad ilo sou an gidigidad dop Ru Sewak an niñen o ilod lo rumok a.

<sup>12</sup> Agop an lo fidian a ru rumok ak ilod lo ta rumok nag, kagin saiak an dile dugo ilod siñaokan go youd isa dan, bitinaek an lo dutur pe dudu diau geig a.

### *Atur sakar a*

<sup>13</sup> Teim taoma, mañ nal fidian aŋ e Anut ilon ipanaŋ den niñemi wo inj ilo uyan mupani man uyanan a. Man dugo, fun lo mok Anut ipilianaŋ

a, ago tag Awan Urgun idiraj go gun alasa dan lo, agod ru rumok a ilom lo rumok dan lo dam, patu pasek ale wa.

<sup>14</sup> Kristus san ru aŋsam na mufulale amaiak lo, Anut aŋ igianj an lo patu pasek ipanaŋ a. An lo idsdad Tubun ak Jesus Kristus iŋsan girager amaiak aŋ dam aŋjanep amado wa.

<sup>15</sup> Teim taoma, fun an niŋen o atur sakar a. Agod Kris kagin mipitenjanaŋ an, awama lo alon se yan, agod a manjsama girek lo asuti an dam mi abi sakar pe ari uyanan a.

<sup>16</sup> Anut idsdad Bai niŋed o imat dugo, iŋsan ilo panek lo maror bubed lo pem pem yen yau san, agod mala nouk mel sinjaokan san da ipanad a. Anut nek an idsdad Tubun en Jesus Kristus iŋsen ida

<sup>17</sup> maror bubem lo digane dop, dabai dupanaŋ dan lo urat fidian uyan ak agane wak, agod niŋen uyan uyan ak abol ilasa wan dam, aŋ idaisuda geig a.

### 3

#### *Agudani dop Anut ibinawama wa*

<sup>1</sup> Ru wadan, ŋai teig taog, maŋ niŋema wo agudani wa. Ago dop Anut maŋ ibinawamap iŋsan ru imaspalup aben fidian lo yau kisaek onj a. Anut asumiani dop panu panu asau ak san tamolpein, lulunŋad lo iŋjanen ru tubun mi iŋsad leil lo ilasa wa, nek ibol aŋsem lulunŋam lo ilasa na yak ago mi a.

<sup>2</sup> Agod taida mi, aŋ agudani dop tamol saiadi, agod tamol a iŋsad kagin naok senamo geig ak dida, iŋsad tuod lo maŋ patuma ipasi wa. Man dugo, tamol fidian iŋ ilo rumok amad tia ya.

<sup>3</sup> Aloŋ ak, Tubun en iŋ awa yabek tamol mi a. Amaiak niŋen o iŋ aŋ isatuanaŋ a. Agod iŋsen mi dumui igo, Satan muruan ipanaŋ o igane dop, naon dal ifutani wa.

<sup>4</sup> Agod Tubun en aŋ niŋemi wo mel e rumok en maŋ ikubiai panama ya. Ru kagin dugo gubak mi mupanaŋ an aŋ agane da, agod murna dop nek ago mi agane yau a.

<sup>5</sup> Nai Anut ḷjugudani dop Tubun en aŋ dal ikubiai panan a, an lo Anut san ilo panek ka bubem lo yen a, agod nek Kristus itur sakar na yak igo, aŋ dam ka ago agane wa.

### *Ayalis dan niŋen o kagin agane wa*

<sup>6</sup> Maŋ teim taom, Tubun ak Jesus Kristus yanjan lo maŋ ru kagin en mupanaŋ da. Teid taod Kris adi ensauta a urat digane wo dumoi go, iŋsad madok an san piteŋjanek maŋ awama lo aŋjane yan ta diri dupani na dan, aŋ sinjired na ta au na wa. Tamol naok ago yak dam dadi ta ator na wa.

<sup>7</sup> Man dugo, aŋ aŋsem maŋsama kagin naok dugo woŋ ari apani san aloŋ uyanan a. Aŋ ilom isou, saen maŋ aŋ luluŋjam lo tumado se yan miyalis man tia ya.

<sup>8</sup> Maŋ aenta sad anaŋ mani se yan, pempem madad na ya. Rumok geig, maŋ nal fidian tidom ad urat migane da. Fun dugo, maŋ tamolpein aenta aŋ luluŋjam lo dumado dan maŋ kagin dupanama se yan lo muruan mupidinai man mamoi a.

<sup>9</sup> Rumok geig, maŋ tamol yanjama tubun ak mi a. Amaiak niŋen o iloma ibol tap man, maŋ ka aŋ musumianan dop kagin apanama wa. Gug ago migane wan mamoi a. Man dugo, maŋ aŋsam

tinanou igo woŋ mumado da, an lo aŋsem ale dop maŋsama madok en mi ari wa.

<sup>10</sup> Agod saen imug mi maŋ aŋ da tumado se yan maŋ ru e dabai en mupanaŋ a. “Tamol ta urat igane wo imoi tap, aenta sad anaŋ ta yani na wa.”

<sup>11</sup> An niŋen o maŋ durupaiama ya, tamolpein kadi urat digane wo dumoig urat ta digane na da. Kawan dutor dop tamolpein aenta sad muruan lo kabunjad mi disoduduni da.

<sup>12</sup> Tubun ak Jesus Kristus yaŋan lo, maŋ tamolpein naok ago yan dutokubol pe urat digane wo mususuŋanai dop ru dabai mupidinai da. An lo iŋ moni diŋjanep ate iŋjaned anaŋ ka didad a.

<sup>13</sup> Agod aŋ fidian niŋemi wo man maŋ igo mabol da. Aŋ kagin uyan ak agane wo ilom ta isali na wa.

<sup>14</sup> Aria, talpein ta ru kubiaeŋ girek en lo migire idu yen ta iloŋ na tap, talpein an aŋ ale wo uyan dop ida ta ator na wa. Man dugo, aŋ ago agane dop man, iŋ miai ifuni wa.

<sup>15</sup> Ak man aŋsam ager tamol igo woŋ ta agane na wa. Tia, ru dabai ak arupeı dop ru kagin dam apani wa. Nek ibol aŋjanem teim mok lo agane dak ago mi agane wa.

### *Ru wadan*

<sup>16</sup> Tubun ak iŋsen maror san fun. Iŋ nal fidian ka bubem lo maror ipanaŋ ak, dal funfun lo dam mi a. Anut ka aŋ fidian da amado wa.

<sup>17</sup> Nai Pol ru wadan ɿaiseg banig mok nam ɿigire ya. Nai girek fidian ɿigire den lo ago ɿigane da. Ata wo, nai banig mok nam girek e ɿigire den lo, tamolpein fidian dulonj man, girek en ɿaisag na mok ipalu ya.

**18** Idsad Tubun ak Jesus Kristus san ilo panek anj fidian da amado.

**Anut san bilalun foun  
The New Testament in the Takia Language of Papua  
New Guinea  
Nupela Testamen long tokples Takia long Niugini**

Copyright © 1999 The Bible Society of Papua New Guinea

® Faith Comes by Hearing

Language: Takia

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-12-11

---

PDF generated using Haiola and XeLaTeX on 18 Mar 2025 from source files dated 31 Aug 2023

757b3e4e-2023-5b45-893a-ee9294ddeb9d